

Pravosudna komisija Brčko distrikta BiH, na osnovu člana 14. stav (1) tačka n) Zakona o Pravosudnoj komisiji Brčko distrikta BiH („Službeni glasnik Brčko distrikta BiH“, br.: 19/07, 20/07 i 02/08) i odredbe člana 116. Zakona o Sudskoj policiji Brčko distrikta BiH („Službeni glasnik Brčko distrikta BiH“, broj: 03/21) , na ____ redovnoj sjednici održanoj dana ____ godine donosi sljedeći

PRAVILNIK O TESTIRANJU PRILIKOM ZAPOŠLJAVANJA U SUDSKOJ POLICIJI BRČKO DISTRIKTA BIH

DIO PRVI - OPŠTE ODREDBE

Član 1 (Predmet Pravilnika)

Ovim Pravilnikom utvrđuju se plan testiranja, način testiranja i bodovanja, tijela koja vrše testiranje kao i druga pitanja koja su od značaja za provjeru stručne, radne i druge sposobnosti kandidata u procesu odabira za prijem u Sudsku policiju Brčko distrikta BiH (u daljem tekstu: Sudska policija).

Član 2 (Pravo na testiranje)

Samo kandidati koji ispunjavaju opšte i posebne uslove imaju pravo pristupa testiranju.

Član 3 (Nivoi pristupanja)

(1) Testiranje kandidata vrši se u zavisnosti od nivoa pristupa u Sudsku policiju.

(2) Nivoi pristupa u Sudskoj policiji su:

- a) u činu sudskog policajca - kao prvi nivo pristupanja za kandidata koji se prima u Sudsku policiju na radno mjesto za koje je propisana završena SSS - IV stepena;
- b) u činu mlađeg inspektora Sudske policije - kao drugi nivo pristupa za kandidata koji se prima u Sudsku policiju na radno mjesto za koje je propisan završeni prvi ciklus visokog obrazovanja s ostvarenih 180 ECTS bodova ili VŠS - VI stepen stručne spreme;
- c) u činu višeg inspektora Sudske policije – kao treći nivo pristupa za kandidata koji se

prima u Sudsku policiju na radno mjesto za koje je propisan završeni prvi ciklus visokog obrazovanja s ostvarenih 240 ECTS bodova ili VSS - VII stepen stručne spreme;

d) u činu samostalnog inspektora Sudske policije – kao četvrti nivo pristupa za kandidata koji se prima u Sudsku policiju na radno mjesto komandira Sudske policije.

DIO DRUGI - PROCEDURA TESTIRANJA

Član 4

(Vrijeme održavanja testiranja)

Testiranje se obavlja najkasnije 90 radnih dana poslije isteka roka za prijavljivanje.

Član 5

(Raspored testiranja)

(1) Kandidati se testiraju po sljedećem rasporedu:

- a) pismeni test stručnog znanja;
- b) usmeni intervju;
- c) test fizičke sposobnosti;
- d) provjera poznavanja rada na računarima;
- e) drugi test koji Sudska policija smatra potrebnim ili opravdanim.

(2) Kandidat koji ne zadovolji na jednom od testova iz stava (1) ovog člana isključuje se iz daljnjeg postupka odabira.

Član 6

(Plan testiranja)

Plan testiranja utvrđuje komisija za zapošljavanje koju formira Pravosudna komisija Brčko distrikta BiH za svaki oglas prije isteka roka za prijavljivanje kandidata.

Član 7

(Komisija za zapošljavanje)

(1) Izbor kandidata vrši komisija za zapošljavanje formirana u skladu sa Zakonom o službenicima i namještenicima u pravosuđu Brčko distrikta BiH.

(2) Komisija za zapošljavanje:

- a) utvrđuje sadržaj testova iz člana 5. ovog Pravilnika;
- b) utvrđuje konačni rezultat za svakog kandidata na osnovu ukupnog broja rezultata svakog testa;
- c) sastavlja i objavljuje listu kandidata koji su pristupili testiranju;
- d) predlaže kandidate koji imaju najveći broj bodova sa liste iz tačke c) ovog stava, radi upošljavanja u skladu sa oglašenim brojem slobodnih radnih mjesta;

- e) obavještava kandidate o rezultatima koje su postigli;
- f) objavljuje sva pitanja putem web stranice Pravosudne komisije Brčko distrikta BiH, od kojih će biti sačinjeni pojedinačni testovi u procesu pismenog testiranja kandidata, najkasnije 24 sata prije testiranja.

Član 8 (Provjera zdravstvene sposobnosti)

Provjeru ispunjenosti zdravstvene sposobnosti kao posebnog uslova za zasnivanje radnog odnosa vrši komisija za zapošljavanje u skladu sa Pravilnikom o kriterijumima i načinu utvrđivanja posebne zdravstvene sposobnosti službenika Sudske policije Brčko distrikta BiH.

Član 9 (Izrada pismenog testa)

(1) Pitanja za pismeni test stručnog znanja utvrđuje komandir Sudske policije zajedno sa Stručnom službom Pravosudne komisije Brčko distrikta BiH.

(2) Komisija za zapošljavanje utvrđuje sadržaj pismenog testa stručnog znanja u skladu sa Pravilnikom za zapošljavanje u pravosuđu Brčko distrikta BiH.

Član 10 (Trajanje testa)

(1) Pismeni test stručnog znanja kandidat radi najduže 60 minuta.

(2) Prilikom rješavanja testa, kandidatu nije dozvoljeno korištenje bilo kakve literature, mobilnog telefona i drugih tehničkih pomagala, kao ni vršenje ispravki izbora tačnog odgovora.

Član 11 (Usmeni intervju)

Pitanja za usmeni intervju utvrđuje komisija za zapošljavanje u skladu sa pravilima propisanim Pravilnikom o zapošljavanju u pravosuđu Brčko distrikta BiH.

Član 12 (Test fizičke sposobnosti)

(1) Test fizičke sposobnosti sprovodi komisija za zapošljavanje.

(2) O vremenu i mjestu sprovođenja testa fizičke sposobnosti komisija za zapošljavanje kandidate obavještava putem internet stranice Pravosudne komisije Brčko distrikta BiH.

Član 13
(Provjera poznavanja rada na računaru)

Provjera poznavanja rada na računaru kao posebnog uslova za zasnivanje radnog odnosa vršiće se u skladu sa pravilima propisanim Pravilnikom o zapošljavanju u pravosuđu Brčko distrikta BiH.

DIO TREĆI - METOD, NAČIN I SISTEM BODOVANJA

Član 14
(Pismeni test stručnog znanja)

(1) Pismeni test stručnog znanja sastoji se od 25 pitanja i:

- a) svako pitanje ima više ponuđenih odgovora a tačan je samo jedan,
- b) kandidat će na listiću za odgovore označiti tačan odgovor u kvadratiću,
- c) svaki tačan odgovor se boduje sa jednim bodom,
- d) maksimalan broj bodova na testu je 25,
- e) vrijeme trajanja pismenog testa je 60 minuta,
- f) pismeni test stručnog znanja se vrednuje na sljedeći način:
 - 1) - do 16 bodova ocjena 1 - nezadovoljava
 - 2) - od 17 do 18 bodova ocjena 2 - zadovoljava
 - 3) - od 19 do 20 bodova ocjena 3 - dobar
 - 4) - od 21 do 22 bodova ocjena 4 - vrlo dobar
 - 5) - od 23 do 25 bodova ocjena 5 – odličan

(2) Nakon sprovedenog pismenog testiranja komisija za zapošljavanje sačinjava zapisnik o obavljenom pismenom testiranju koji sadrži rang listu kandidata koji su na pismenom testu ocijenjeni ocjenom 2 – zadovoljava ili većom ocjenom.

(3) Pravo pristupa usmenom testu ima kandidat koji je na pismenom testu ocijenjen ocjenom 2 – zadovoljava ili većom ocjenom.

Član 15
(Usmeni intervju)

(1) Usmeni test – intervju provodi se na sljedeći način:

- a) svaki član komisije za izbor učestvuje u usmenom intervju postavljajući po jedno pitanje (ukupno tri pitanja) i ocjenjuje kandidata ocjenom od 1- nezadovoljava do 5- odličan uz obrazloženje;
- b) na sadržaj pitanja na usmenom testu shodno se primjenjuju pravila Pravilnika o zapošljavanju u pravosuđu Brčko distrikta BiH.
- c) ocjena usmenog testa predstavlja zbir ocjena koje su dali članovi Komisije za zapošljavanje podijeljen sa brojem članova Komisije.
- d) kandidat je zadovoljio na usmenom testu ako je ocijenjen ocjenom 2 - zadovoljava ili većom ocjenom.

(2) Nakon sprovedenog usmenog intervjua komisija za zapošljavnje sačinjava zapisnik o obavljenom usmenom testu koji sadrži rang listu kandidata koji su na usmenom testu ocijenjeni ocjenom 2 – zadovoljava ili većom ocjenom.

Član 16
(Testiranje fizičkih sposobnosti)

(1) Test utvrđivanja fizičke sposobnosti sastoji se iz provjere morfološke i motoričke sposobnosti.

(2) Prije stupanja na provjeru motoričke sposobnosti, svaki kandidat će potpisati izjavu da je dobrovoljno pristupio provjerama i da u slučaju eventualne povrede Pravosudna komisija ne snosi bilo kakvu odgovornost.

(3) Kriterij za ocjenu morfološkog statusa:

a) morfološki status:

Muškarci
Tjelesna visina : 170 cm i više
Tjelesna težina: +10 i –10 kg u odnosu na visinu u cm - 100
Žene
Tjelesna visina :160 cm i više
Tjelesna težina : +10 i –10 kg u odnosu na visinu u cm - 100

b) Kriteriji morfološkog statusa su eliminatorni.

(4) Testiranje motoričkih sposobnosti vrši se primjenom četiri testa i to:

a) muškarci:

R. br.	Naziv testa	Kriterij testa
1.	Broj sklekova za 20 sekundi	9 i više
2.	Broj preklona za 30 sekundi	16 i više
3.	Skok udalj iz mjesta	210 cm i više
4.	Kuper test (test trčanja 12 minuta) 2400 m i više	2400 m i više

b) žene:

R. br.	Naziv testa	Kriterij testa
1.	Broj sklekova za	20 sekundi 6 i više

2.	Broj pretklona za 30 sekundi	12 i više
3.	Skok udalj iz mjesta	150 cm i više
4.	Kuper test (test trčanja 12 minuta) 2400 m i više	1700 m i više

(5) Opis testova motoričkih sposobnosti:

a) Sklekovi za 20 sekundi:

1) Instrumenti: Štoperica sa 1/10 sek.
 2) Zadatak: Kandidat zauzme položaj na rukama tako da prstima nogu i dlanovima dodiruje podlogu, tijelo i ruke zauzimaju položaj pravog ugla, iz te pozicije kandidat se spušta naprežući mišiće sve dok grudima ne dodirne pod, a zatim se ponovo podigne u prvobitni položaj, žene rade test sa koljena.

3) Ocjenjivanje: Ocjenjuje se broj pravilnih izvedenih i dovršenih sklekova u intervalu od 20 sekundi.

4) Napomena: Kandidat sve vrijeme drži opruženo tijelo, tijelo se ne smije njihati naprijed i nazad pri spuštanju, laktovi pri spuštanju i podizanju moraju prolaziti iznad tijela.

b) Pretklon za 30 sekundi:

1) Instrumenti: Štoperica sa 1/10 sek.
 2) Zadatak: Kandidat leži na leđima, na tlu (strunjača) sa nogama zgrčenim pod uglom od 90 stepeni, dlanovi su ukršteni na potiljku sa laktovima razmaknutim u stranu, partner mu fiksira stopala, kandidat izvodi podizanje trupa sa zasukom, naizmjenično u lijevu i desnu stranu što brže može, u intervalu od 30 sekundi, pritom mora dotaći laktom suprotno koljeno.

3) Ocjenjivanje: Ocjenjuje se broj pravilno izvedenih i dovršenih dizanja u vremenu od 30 sekundi.

c) Skok u dalj iz mjesta se izvodi u dva pokušaja i ocjenjuje se bolji rezultat:

1) Instrumenti: Tatami strunjače, čelična traka za mjerenje.
 2) Zadatak: Kandidat se odrazi sunožno sa linije obilježene na parketu i doskoči na strunjaču što može dalje, obavezan je sunožan doskok, izvode se dva pokušaja, nepravilno izvedeni skokovi se ponavljaju.

3) Ocjenjivanje: Mjeri se dužina skoka normalno na odraznu liniju, boduje se bolji rezultat izmjeren u centimetrima, tačnost mjerenja je jedan centimetar.

4) Napomena: Prije svakog skoka kandidat namaže pete magnezijem, kandidat skače bos, dupli odraz nije dozvoljen, skok se izvodi iz sunožnog položaja stopala, dozvoljeno je podizanje na prste prije skoka.

d) Kuperov test trčanja 12 minuta:

1) Instrumenti: Štoperica, staza od 400 metara, pištaljka.
 2) Zadatak: Kandidati sa cilja iz visokog starta kreću na znak pištaljke, trče ili hodaju 12 minuta.

3) Ocjenjivanje: Mjeri se pređena dužina.

(6) Testovi motoričkih sposobnosti ocjenjuju se na osnovu postignutih rezultata, ocjenom od jedan (1) do pet (5) za svaki test.

(7) Kandidat nije zadovoljio ukoliko je na bilo kojem testu motoričkih sposobnosti ocijenjen sa ocjenom jedan (1) i elimiše se iz daljeg testiranja i procesa odabira.

(8) Kandidatima koji su zadovoljili na testovima motoričkih sposobnosti, određuje se ocjena koja predstavlja zbir ocjena svih testova podijeljen sa četiri.

(9) Normativi procjene motoričkih sposobnosti:

a) Sklekova

POL	OCJENA				
	1	2	3	4	5
MUŠKARCI	8 i manje	9	10	11	12 i više
ŽENE	5 i manje	6	7	8	9 i više

b) Pretklona

POL	OCJENA				
	1	2	3	4	5
MUŠKARCI	15 i manje	16-17	18-19	20-21	22 i više
ŽENE	11 i manje	12-13	14-15	16-17	18 i više

c) skok u dalj iz mjesta

POL	OCJENA				
	1	2	3	4	5
MUŠKARCI	209 i manje	210-219	220-229	230-239	240 i više
ŽENE	149 i manje	150-159	160-169	170-179	180 i više

d) kuper test

OCJENA	MUŠKARCI	ŽENE
1	2399 i manje	1699 i manje
2	2400-2600	1700-1800
3	2601-2800	1801-1900
4	2801-3000	1901-2000

5	3001 i više	2001 i više
---	-------------	-------------

(10) Nakon sprovedenog fizičkog testiranja komisija za zapošljavanje sačinjava zapisnik o obavljenom fizičkom testiranju koji sadrži rang listu kandidata koji su na fizičkom testiranju ocijenjeni ocjenom 2 – zadovoljava ili većom ocjenom.

(11) Testiranju fizičkih sposobnosti ne podliježu kandidati koji u Sudsku policiju pristupaju u činu višeg i samostalnog inspektora.

DIO ČETVRTI - ZAVRŠNE ODREDBE

Član 17 (Stupanje na snagu)

Ovaj pravilnik stupa na snagu danom donošenja a objaviće se u „Službenom glasniku Brčko distrikta BiH“.

PREDSJEDNIK
PRAVOSUDNE KOMISIJE

Safet Pizović

Broj: SuPK-03-____/21

Datum: _____.